

東

華

錄

東華錄

順治二十六

臣王先謙敬編

臣周倫蕃恭校

順治十三年丙申春正月庚辰朔 上幸南苑○癸未諭內三院
朕惟紀一朝之得失爰有史書考百代之是非厥惟通鑑顧筆削
互異論斷相衡卷帙雖紛得中尙寡何以昭垂永久號稱完書朕
茲欲將諸家所纂廣加裒集刪繁考異訂爲一編名曰通鑑全書
特命巴哈納額色黑劉正宗傅以漸爲總裁官張長庚禪代麻勒
吉鑑特折庫訥胡兆龍張懸錫李蔚白允謙爲副總裁官卿等受
茲委任須精勤蒐討公愼參評務使古來政治盛衰人才善惡昭
明畫一以副朕致治垂憲之意○諭自古平治天下莫大乎孝孝
爲五常百行之原故曾子備述孔子之言以爲孝經昭示後世上

自天子下逮庶人至孝之道罔不備焉朕觀其立言正大意旨深
遠苟非取古人言行關於孝道者推而廣之不足以彰其義茲欲
博採羣書加以論斷勒成一編名曰孝經衍義特命馮銓爲總裁
官馮溥黃機吳偉業王熙曹本榮姜元衡郭棻宋之繩爲編纂官
卿等鵬茲委任須勤敏敬慎悉心蒐輯務俾讀者觀感效法以稱
朕孝治天下之意○乙酉工部製造庫奏修葺襄親王府第需用
赤金四百兩爲釘片鍍金之用得旨此乃王所暫居又非勦造偶
爾修葺赤金四百兩安所用之且修乾清宮時尙須儉樸今何得
估計糜費如此之多其工部製造庫官員吏部從重議罪以聞○
內三院奏封贈等官墓碑考之會典止有碑式大小其碑上應用
何文未有成例查故明封贈之官墓碑稱誥贈某官某人之墓亦
有子孫自將封贈誥命之文刊刻碑文者亦有不刊刻者今臣等

議臣子榮親以王言爲重凡蒙恩封贈官員似應子孫自備石

碑各將所得誥命刊刻以垂永久從之○戊子朝鮮來貢○己丑

轉楊義爲刑部左侍郎以董國祥爲刑部右侍郎

由宗人府府丞遷

○贈

故兵部尙書李際期太子少保諡僖平廕子平入監讀書舊例部院三品以上官三年任滿勤事以死者方准贈廕際期未滿三年

卒上念其勤瘁殞身特予優典云○庚寅以能圖爲副都御史

由學士遷

○己亥海寇犯台州副將馬信以城叛降於賊○庚子封衍

僖郡王羅洛宏子諾尼爲貝勒○辛丑初定南靖寇大將軍固山

額眞陳泰卒於軍至是從征大臣回京陛見上曰大將軍固山

額眞陳泰爲朕效力中道病亡朕甚痛悼諭畢揮淚不止又曰爾

等離親戚捐妻子爲朕宣力年久今見爾等形貌癯瘠朕倍覺惻

然諸臣奏曰宣力效勞人臣之誼臣等有何功績致塵聖懷今

得親 天顏臣心足矣 上垂涕親勞以酒諸臣感泣跪飲 上復念大將軍悲悼不已召學士麻勒吉一等侍衛覺羅塔大諱曰若大將軍班師回京朕將親酌酒以慰勞之不幸中途棄捐不復相見爾等以此一觴奠大將軍靈次少抒朕追悼之懷諸臣及左右侍從無不感泣○甲辰免浙江富陽等六縣去年被災額賦○乙巳免江西八年逋賦

二月乙卯致仕刑部尙書任濟卒○丙辰諭禮部文武兩途乃治天下之要務不可偏重今觀八旗各令子弟專習詩書未有講及武事者殊非我朝以武功混一天下之意爾部其酌量每牛条下當讀滿漢書子弟幾人定爲新例具奏凡應試及衙門取用均在定數之內其定數外讀書子弟各衙門無得取用亦不許應試○丁巳 皇太后聖壽節 上親製 萬壽七言律詩三十首奉表

文進呈並製序簡端○戊午諭經畧大學士洪承疇曰日者逆渠孫可望猖狂犯順遣發僞帥統率多賊夜襲常德爾與定南靖寇大將軍陳泰等籌畫有素調度合宜文武將士莫不用命勦力水陸追勦大獲全勝張捷伐之偉畧絕窺伺之狡謀論敘膚功已頒懋賞仍賜特諭彰朕嘉悅之意爾尙益摠遠畧大展壯猷淨埽寇氛佇膺殊寵欽哉○免湖廣荊州安陸常德武昌黃州去年被水額賦○己未諭禮部朝廷用人文武兩途本無異視設有品級所以辨尊卑昭等威也如係職任相關尤難陵越前見會議文武各官相見儀節內一應有司俱與總兵官副將平行甚至有官階七品亦與之抗禮朕思督撫總兵官與巡按俱奉特命差遣任寄原重自難以品級論其餘州縣等官俱與一品二品武官抗禮殊屬未協武臣披堅執銳宣力封疆體統若輕臨事必多滯礙豈文武

並重之意爾部再會同吏兵二部詳議妥確具奏○分江南華亭縣爲兩邑舊邑名華亭新邑名婁縣○辛酉贈故山西巡撫祝世昌爲兵部右侍郎諡僖靖廕一子入監讀書○壬戌命大學士車克學士麻勒吉傳諭大學士金之俊劉正宗傳以漸等曰君臣之誼終始相維爾等今後毋以引年請歸爲念爾等受朕殊恩豈忍違朕卽朕亦何忍使爾等告歸若決於引退卽忍於忘君矣之俊等奏曰臣等蒙 皇上隆恩但懼不能報效誠何心忍違 皇上自今以後斷不敢懷告歸之念也○戊辰 上以右庶子王熙精通滿書以御服貂珪賜之因諭諸預習滿書等七人曰爾等同爲習滿書翰林而王熙獨優朕故加賜爾等所學不及亦當自慚今後其益加勤勉毋怠因賜大學士金之俊劉正宗傳以漸及王熙漢字表忠錄各一部復以二十六部分賜大學士陳之遴及都察

院漢堂官漢科道官仍諭有未曾賞給者具名以聞○移兩廣總督駐梧州從經畧洪承疇請也○靖南王耿繼茂奏我師抵南甯逆賊李定國奔往安隆鎮臣馬雄等擒其僞陽春伯李先芳陣斬僞參將杜紀等俘獲無算下所司察敘○己巳川陝總督金礦引年乞休加太子太保以原官致仕○庚午諭吏部國家考績之典所以辨功能昭勸懲不可無畫一章程自今以後部院滿官除有事故罪過外三年俸滿者三品以上自行具奏爾部分別議奏四品等官各衙門咨呈爾部分別議奏朕悉覈其優劣定爲勸懲其六年一次會行京察之例三品以上自陳爾部會同都察院察議具奏四品等官各衙門咨呈爾部爾部仍會同都察院察議具奏朕皆親覈優劣以定去畱考察之時加升者有罪者及才能不及老疾等項詳細開列永爲定例遵行部院滿官今年卽照此例考

滿○諭閩浙重地海氛未靖全賴總督重臣和輯文武撫綏軍民庶能同心勦禦克奏膚功屯泰久與浙撫不睦屢次疏奏似此督撫參商封疆何賴秦世楨已經解任屯泰亦著回京另用兩廣總督李率泰著加太子太保總督浙閩地方固山額真王國光著以兵部尙書兼都察院右都御史總督兩廣地方○辛未裁江南陝西山西山東湖廣河南六省興屯道同知○停福建鼓鑄○先是河西務分司員外郎朱世德虧空額稅一萬三千餘兩有計其多徵侵盜諸款者事未審結戶部將缺額銀兩援赦議免吏部亦照議覆上以缺額過多或有情弊命都察院察議至是議朱世德應革職交刑部審擬上因切責部臣如此大弊不行察覆令回奏於是部臣奏因屢次催提人犯議俟到日另結至輕援恩赦疏忽何辭得旨爾部考覈司官務宜秉公詳察朱世德缺額既多又

經告發爾等不嚴行確究乃以人犯到日另結爲辭含糊引赦代爲出脫情弊顯然此回奏殊屬支飾著議政王貝勒大臣九卿詹事科道會同從重議處具奏○丙子 上在南苑命兩翼內大臣侍衛等擐甲胄閱騎射召內院漢大學士翰林及部院尙書以下四品以上各官從觀復陳圍獵以示羣臣 上還御行殿命大學士覺羅巴哈納學士麻勒吉折庫納等引諸臣入序坐 上召吏部尙書王永吉戶部尙書戴明說等責輕出朱世德之罪復諭大學士陳之遴曰朕不念爾前罪復行簡用且屢加誠諭爾曾以朕言告人乎抑自思所行亦曾少改乎之遴奏曰 皇上教臣臣安敢不改特臣才疏學淺罪過多端不能仰報 皇上耳 上曰朕非不知之遴等而用之卽若輩朋黨之行朕亦深悉但欲資其才故任以職且時時教飭之者亦冀其改過效忠耳因責左副都御

史魏裔介等曰爾等職司言責當大破情面乃嬖阿緘默何爲也
前此明知陳名夏之惡皆畏其威罔敢摘發今爾等能無自愧乎
爾等既有專職乃絕不一言或雖言而不直朕用爾爲言官何益
是不如不用之爲愈也復諭諸臣曰今人多結朋黨究其結黨之
意不過互相攀援以求富貴耳若然是有損而無益也朕常爲黨
人思之既恐黨類之不合復恐聲名之不聞與往來周旋之不至
又恐事發禍隨或被入舉首戚戚若此何若爲國效忠安享富貴
之爲榮乎縱使黨與已成及陷誅戮孰能庇免卽如誅陳名夏黜
龔鼎孳時其黨有一人出而救之或分受其過者乎且多有因而
下石者是名爲朋黨而徒受黨之害也審乎此則何不寢其朋謀
而盡力於國家耶朕觀爾等膺受國恩皆有數頃之田數椽之屋
衣食亦足自贍夫人有衣食以資生是亦可矣乃猶不足更欲何

爲朕觀宋明亡國悉由朋黨其時學者以程頤蘇軾爲聖賢程頤蘇軾非黨則蜀洛之名何自而生嗣後各樹門戶相傾相軋宋之亡實兆於此學者雖明知之而不敢置議可不爲大戒歟朕自親政以來以寬爲治恆謂洪武誅戮大臣爲太過由今以觀太寬亦不可也裔介奏曰自古寬嚴相濟過寬而生玩卽用嚴亦宜上曰朕之所以教爾等者誠視爾等如子欲其改過遷善爾等嗣後亦當體悉朕心勇於去不善以勉於善不然國法具存朕亦不能爲爾等寬也諸臣皆頓首受命永吉等奏曰上諭誠然臣等惟有懼忤夫復何辭但諸臣既有朋黨豈肯自言惟後來事覺皇上不從寬貸則咸知儆惕矣上曰願仁之事已然奈何不以爲戒乎諸臣皆奏曰謹識於心上又指大學士金之俊曰昨歲之俊疾甚朕遣人圖其容念彼已老儻不起不復相見故乘其在時

命工繪像蓋不勝眷戀如此爾諸臣內亦有衰老者豈不有歸田
休養之念但經朕簡用之人欲皓首相依不忍違離也前置陳名
夏於法時朕甚憫惻爲之墮淚蓋朕所任用之人不能使之改過
以致獲罪用是悼歎耳朕於爾等亦不忍離爾等獨何心而欲離
朕即使衰老致仕亦宜頤養京師常趨闕廷使君臣得時時相見
以慰遲暮不亦善乎之俊泣奏曰諸臣中無才者莫過於臣受
皇上深恩而負重罪者亦莫過於臣但錯誤甚多惟恐廢職非忍
於離皇上也羣臣奏曰皇上眷育如此臣等斷不敢萌退處
之念矣於是賜諸臣茶饌上還宮諸臣亦退復命大學士覺羅
巴哈納學士麻勒吉折庫納等傳諭諸漢臣曰今觀風俗日移人
心習於澆薄遇幼年受業之師畧不致禮惟以考試官爲師終身
加敬夫以理論則自幼教育之師受其訓導自宜始終敬禮若考

試官員朕所遣也豈受業者比哉自後此等悉宜明禁革之○以

白秉真爲四川按察使

由山東興屯道副使遷

○免山東東平濮州長山縣

去年旱災額賦○戊寅左副都御史魏裔介劾奏大學士陳之遴

當 皇上詰問時不自言其結黨之私力圖洗滌以成善類而但

云學疏才淺不能報稱其良心之昧亦甚矣如安肅知縣沈令式

庸劣不堪之遴諷禮部尙書胡世安保薦知府令式旋被總督李

蔭祖糾參植黨營私確有可據密勿之地恐之遴一日不可復居

也得旨陳之遴身爲大臣奏對自當以實昨經朕面詰止以才疏

學淺引咎朦朧支飾全無誠心殊非大臣事君之道此所參事情

著據實明白回奏胡世安亦著明白回奏○以福建右布政使張

尙爲左僉都御史○裁直隸永平府檢校知事各一府學訓導一

昌黎樂亭二縣縣丞各一○己卯諭吏部大學士馮銓贊襄機務

歷有歲年恪慎勤勞裨益宏多朕近見其齒長力衰難勝繁劇應解院事用便頤養著加升太保兼太子太師祕書院大學士禮部尙書致仕念其器識老成學問充裕可以文章資朕著仍在朕左右以備顧問一切經史著述編摩皆令專任

三月庚辰 上至自南苑幸瀛臺○鄖陽撫治胡全才奏饒營千總朱光祚等擒僞總督李企晟又四川僞總兵胥登榮遣僞副將張鳳翼等詣漢中府投誠○壬午給事中王楨奏大學士陳之遴係前朝被革詞臣來投闕下不數年間超擢尙書旋登政府不圖報效市權豪恣昨南苑賜宴 皇上面加呵斥凜凜 天威而之遴不思閉閣省罪卽於次日遨遊靈佑宮逍遙恣肆罪不容誅乞重加處分以儆邪污命之遴據實回奏不得仍前支飾以蹈欺蒙之咎○癸未免湖北景陵等九縣去年旱災額賦○甲申御史焦

毓瑞奏禮部尙書胡世安受大學士陳之遴屬託濫舉之遴同鄉
安肅知縣沈令式堪任知府徇私背公法應連坐得旨之遴世安
一併明白回奏○乙酉論平定廣東功將士升授有差○予死事
沅陵縣楊來鳳官○大學士陳之遴引罪回奏得旨陳之遴既知
罪戾甚多此回奏又不明言罪狀但請處分沈令式是否鄉親並
未說明既稱其頗有能聲卽係徇私推獎何得蒙混推辭奏內南
北各親其親各友其友等語朕所痛惡平日誠諭何等嚴切乃不
思省改自認姻戚鄉曲往來會晤明係故違朕諭殊屬可憾著吏
部嚴察議奏○癸巳以護軍統領費雅思哈爲議政大臣○調馬
之先爲兵部尙書兼右副都御史總督陝西三邊四川由宣大調○甲
午命隨征士卒家口全給月糧○定大軍出征班師禮○乙未以
管起鳳爲福建右布政使由湖廣按察使遷許文秀爲廣西按察使由桂平道

參政

○吏部議覆陳之遴擬革職永不敘用得旨陳之遴經朕訓

誠不啻再三望其省改過惡盡去偏心以圖報稱乃毫不自悔任意結黨營私大負朕恩本當罷斥示懲念其既已擢用位至大臣不忍卽行革職著以原官發盛京地方居住○丙申禮部尙書胡世安回奏保舉知縣沈令式憑學臣鹽臣薦章非因陳之遴推獎下部議以失於詳慎罰俸一年從之○己亥諭吏部向以官制宜備設立尙寶司衙門滿漢各官專理用寶事務朕近見該司事簡員多且既有尙寶監承收又經內三院看用該司理事副理事卿丞等官似皆可省今暫行裁去各官照品改用○癸卯諭六部都察院卿寺科道等官朝廷立賢無方不分南北南人中有賢有不肖北人中亦有賢有不肖朕近日處分各官雖多南人皆以事情論非以地方論爾等比肩事主皆當仰體此意凡有論列須從國

家起見毋歧方隅毋立門戶毋洩己私忿毋代人誣陷毋以風聞輒告毋以小過苛求務期公忠自矢共還蕩平之治○丙午諭禮部朕自親政以來夙夜冰兢罔敢怠忽務求克當天心光昭祖德民安物阜早底治平乃近者冬雷春雪隕石雨土所在見告變匪虛生皆朕不德所致朕思天爲天下而立君爲君者代天敷治必使民物咸若治臻上理然後可以仰答眷命今水旱連年民生困苦是朕有負於上天作君之心一過也祖宗勗闢天下以貽子孫爲君者念祖宗櫛風沐雨之勞必闢揚光大四海雍熙然後能守祖宗之成憲朕之天下實本於太祖太宗積功累仁所勗垂今疆圉未靖徵調頻興是朕有負於祖宗付託之心一過也當睿王攝政之時誅降濫賞屏斥忠良任用奸貪國家錢糧恣意耗費以致百姓嗟怨人人望朕何日親政急爲拯救今

經六載雖極力更新乃猶康乂未奏災祲時聞是朕有負於百姓望治之心一過也用是恐懼靡甯撫躬自責披瀝悃誠冀回災變欲昭告於上帝祖宗寶圖省改兩部作速擇吉具奏○諭吏兵二部固山額真朱瑪喇等率兵擊敗侵犯廣東逆賊李定國雪衡州桂林之忿快慰眾心朕甚嘉悅此番軍功止照他處常例議敘其功次不及定數者竟不議敘殊屬不合伊等軍功著再加酌量議敘具奏其軍士有於主帥前首先陷陣殺傷敵兵者亦著確察分別奏聞賞賚今攻城者少野戰者多此後不可仍照舊例敘功爾二部會同將敘功條例會議具奏

夏四月庚戌信郡王多尼等會議吏戶二部議朱世德一案尙書宗室韓岱戴明說侍郎甯古里蘇納海白色純袁懋功畢力克圖海爾圖王宏祚覺羅額爾德朱之弼啟心郎費齊苗澈韓世琦巴

格曹邦理事官木成格達都楊雀祥副理事官朱成格馬爾濟哈
吳努春金光祖郎中馬光裕嚴我公主事張新標等各擬解任削
職有差得旨韓岱於衡州失事情罪至爲重大考之 太祖 太
宗成憲卽應正法朕念係宗室仍望其效力姑從寬免且加任用
乃不思感奮報效圖蓋前愆反依阿蒙蔽大負朕恩本當重處復
念宗室姑從寬著革任削太子太保鎮國將軍品級畢力克圖額
爾德俱革任並革恩詔所得一拜他喇布勒哈番又一拖沙喇哈
番海爾圖革任並革恩詔所得拜他喇布勒哈番罰俸一年巴格
畱任革恩詔所得一拜他喇布勒哈番甯古里革任並革恩詔所
得一拜他喇布勒哈番又一拖沙喇哈番蘇納海白色純各革任
並革恩詔所得一拜他喇布勒哈番罰俸一年費齊畱任革恩詔
所得一拜他喇布勒哈番木成格畱任革恩詔所得一拜他喇布

勒哈番罰俸一年達都楊雀祥俱畱任革恩詔所得一拜他喇布勒哈番戴明說降四級調用王宏祚降三級仍畱原任朱之弼袁懋功各降三級調用馬爾濟哈革任曹邦畱任罰俸二年嚴我公降二級調外用朱成格吳努春金光祖苗激韓世琦俱畱任各罰俸二年馬光裕張新標各降二級調外用餘依議○辛亥兩廣總督李率泰奏粵西僞永安王朱華垓及僞總兵官知府土司百餘員投誠○乙卯 上以災變祭告 南郊 太廟○丙辰予故河南巡撫吳景道祭葬諡愨僖贈太子太保廕一子入監讀書○厄魯特部額爾德尼台吉喀爾喀部土謝圖汗等來貢○辛酉飭諭天下朝覲官○予葭州陣歿將校呂克忠等十二人官廕○甯南靖寇大將軍固山額真阿爾津等奏官兵大破賊渠姚黃於彝陵之蛇倒退山招撫僞官五十二員兵民萬一千三百餘名俘獲人

器械無算下所司察敘○浙閩總督屯泰奏敘在任勦撫功

上以台州失事不知引罪反冒眾人之功切責之旋又以畱懋地方不卽交代並下部議處○壬戌山西陽曲縣地震○丁卯以覺

羅科爾昆爲吏部尙書

由兵部左侍郎遷

○己巳諭吏部六部職掌皆關

國家大政堂官須殫精竭力實心辦理方有裨益圖海原係白身朕破格優擢任用一品不思盡忠報效反孤特恩劉昌改任刑部屢晉崇階乃致刑獄未清闕茸壞法殊負委任圖海著革去拜他喇布勒哈番太子太保降三級劉昌著革去少傅兼太子太傅降三級各照舊辦事恩格德亦係白身洊升尙書胡世安優加一品俱在禮部最久乃典禮甚多未協亦負委任恩格德著革去拜他喇布勒哈番降三級胡世安著革去太子太保降三級各照舊辦事自今以後如不洗心省改仍蹈前轍決不輕貸○調孫廷銓爲

戶部尙書

由兵部調

董國祥爲吏部右侍郎

由刑部調

以梁清遠爲戶部右

侍郎

原任督捕侍郎

○庚午予死事浙江仙遊縣知縣陳有虞官○浙江

巡撫秦世楨以造戰船需材伐宋陵樹木具奏得旨前代陵木不

許採伐原有明禁雖經奏請何得不候旨徑行著議處其伐過樹

木仍照數裁補○以梁清標爲兵部尙書

由吏部左侍郎遷

○癸酉以王

來用爲湖廣按察使

由山西督糧道參政遷

○乙亥以盧崇峻爲吏部侍郎

由理事官遷

張朝璘爲戶部侍郎

由左副都御史遷

○贈仙遊縣陳有虞官

嘉禎官○丁丑以原任左都御史龔鼎孳爲上林苑監蕃育署署

丞○給事中嚴沆奏竊見庶務因循叢脞皆彼此諉卸內外觀望

會議多而職業曠文移費而時日稽自今以後凡遇會議宜有專

責該管衙門務將所議之事先爲詳列可否然後決之廷議斷自

睿裁至諸臣條議時宜亦須虛公酌量參求利病以期有用不

得概泥成見止以毋庸再議沮進言之心而踵瞻顧之習庶政事立而議論清可不勞而臻上理矣 上是其言下吏部都察院詳議○平南王尙可喜奏克復揭陽晉甯澂海三縣○戊寅贈陣歿閒散旗員孟有才官

五月己卯朔以禪代爲吏部侍郎葉成格爲戶部侍郎俱由學士遷○

裁湖廣武昌衛武昌左衛黃州衛蘄州衛安陸衛沔陽衛荊州衛荊州右衛襄陽衛岳州衛九谿衛永定衛長沙衛茶陵衛衡州衛永州衛甯遠衛寶慶衛常德衛辰州衛經歷各一○辛巳以高珩

爲吏部左侍郎

原任

○乙酉戶部尙書覺羅郎球以徇庇朱世德一

案革少保解尙書任○丁亥以莊應會爲刑部右侍郎

由四川右布政使遷

○己丑諭兵部前固山額眞朱瑪喇等統大軍往粵東擊破李定國時平南王尙可喜靖南王耿繼茂總督李率泰率所屬弁兵協

力合勦著有勞績理應一體敘功爾部卽一併議敘具奏○以碩

博會爲吏部侍郎

由理事官遷

○癸巳

上幸南苑

○乙未以石圖爲

兵部右侍郎

由學士遷

克星格爲副都御史

由理事官遷

○己亥免湖北荆

門等十一州縣衛去年被水額賦○以明安達禮爲理藩院尙書

由固山額真遷

張懸錫爲兵部尙書兼右副都御史總督宣大

由弘文院學士遷

○丁未革督捕侍郎吳達禮恩詔所得一拜他喇布勒哈番革霍達職俱戴罪辦事協理督捕少卿趙開心降三級調用理事官胡什八張朝珍俱解任並革恩詔所得一拖沙喇哈番以逃人逃多獲少不行嚴察也

閏五月戊申

上至自南苑幸瀛臺○己酉江南江西總督馬鳴

佩以病免○庚戌刑部奏河西務鈔官員外郎朱世德多征稅課

入己又侵盜庫銀受賄委官各款俱實應絞從之○辛亥贈死事

漳州府同知王顯謨官○癸丑福建巡撫宜永貴以病免○轉徐

永楨爲四川左布政使

由陝西右布政使轉

○土魯番來貢○丙辰兩廣總

督李率奏粵西都康萬承安平鎮安龍英五府上映下石全茗

果化都結恩城憑祥七州上林一縣都陽定羅下旺三司各土官

投誠○己未乾清宮乾清門坤甯宮坤甯門交泰殿及景仁永素

承乾翊坤鍾粹儲秀等宮成○以湖廣布政使張爾素爲通政使

○以郎廷佐爲兵部尙書兼右副都御史總督江南江西

由江西巡撫遷

劉漢祚爲兵部右侍郎兼右副都御史巡撫福建

由江南左布政使遷

○以

擊敗李定國功加平南王尙可喜靖南王耿繼茂歲俸一千兩給

敕獎諭仍賜貂裘鞍馬等物○丙寅以張朝璘爲兵部左侍郎兼

右副都御史巡撫江西

由戶部侍郎遷

○戊辰降吏部侍郎高珩董國祥

各二級調用以議處蒼梧道萬化徇情庇護也○庚午遣官致祭

故明殉難太僕寺寺丞申嘉允諡端愍○壬申贈殉難臨高縣知縣劉承謨官

六月戊寅朔調蔣國柱爲戶部侍郎

由工部調

○吏部議奏平西王下

進士舉人貢監俱照漢軍升轉補授從之○辛巳以大學士車克

兼管戶部尙書事○丁亥以張仲第爲戶部侍郎

由甲喇章京遷

○予故

精奇尼哈番祖大壽祭葬照漢官一品大臣例仍加祭二次○戊

子荷蘭國來貢○己丑諭入旗各牛录朕念滿洲官民人等攻戰

勤勞佐成大業其家中役使之人皆獲自艱辛加之收養誼無可

去乃十餘年間或戀親戚或被誘引背逃甚眾隱匿尤多特立嚴

法示懲窩逃正犯照例擬絞家產盡行籍沒鄰右流徙有司以上

各官分別處分以一人之逃匿而株連數家以無知之奴僕而累

及職官立法如此其嚴者皆念爾等數十年之勞苦萬不得已而

設非朕本懷也爾等亦當思家人何以輕去必非無因果能平日
周其衣食節其勞苦無任情因辱無非刑拷打彼且感恩效力豈
有思逃之理爾能容彼之身彼自能體爾之心若專示嚴法禁止
全不體恤逃者仍眾何益之有朕爲萬國之主念茲犯法諸人孰
非天生烝民孰非朝廷赤子儻刑罰日繁戶口日減爾心亦何能
自安今後務各仰體朕意覺悟省改使奴僕充盈安享富貴豈不
休哉○調梁清遠爲吏部左侍郎由戶部以白允謙爲吏部右侍郎
由國史院○辛卯轉陳培楨爲江南左布政使由河南右布政使以王第
魁爲陝西右布政使由廣東按察使祖重光爲湖廣右布政使由陝西按察使
遷○壬辰山東莒州地震有聲○癸巳敕諭江南浙江福建廣東
督撫鎮等官曰朕維自古帝王底定萬邦皆恩威並用討貳懷服
乃能使人樂於歸往早享太平本朝開創之初睿王攝政攻下

江浙閩廣等處有來降者多被誅戮以致遐方士民疑畏竄匿從海逆鄭成功者實繁有徒或係嘯聚有年未經歸化或係被賊迫脅反正無由或係偶陷賊中力難自拔原其本念未必甘心從逆此輩皆朕赤子迷罔無知深可憫惻今欲大開生路許其自新該督撫鎮卽廣出榜文曉諭如賊中僞官人等有能悔過投誠帶領船隻兵丁家口來歸者察照數目分別破格升擢更能設計擒斬鄭成功等賊渠來獻者首功封爲高爵次等亦加世職同來有功人等顯官封賞皆所不惜儻仍執迷不悟鄭逆所據不過海濱窮島波上遊魂勢不能久一旦絕其糧餉阻其出沒遣發大兵直搗巢穴必致玉石俱焚雖悔亦何及乎其前次陷賊官民及新歸人等地方官問明來歷盡心安插原有田產速行察給卽無田產亦設法周恤務令得所○諭大學士覺羅巴哈納額色黑學士麻勒

吉近因錢糧不敷每日會議全無長策朕思裁汰冗員亦節省之法今加酌量在京官員如大理寺衙門所管事理無多不過三法司會議時少有事耳此等事堂官三員辦理足矣工部衙門有左右侍郎部內諸事郎中主事各司辦之其總理稽察則左侍郎辦之有餘卽無右侍郎亦何不可中書科中書舍人事務簡少允宜酌汰至於道員管理事務繁多尙當增設員數不可復汰科員甚多全無職掌一科中用都給事中等官足矣設漢軍副理事官何爲原因從外行取之員應補御史未遇有缺故改用耳又在外布政司衙門左布政使事煩右布政使有何職掌非冗員而何凡此內外冗員甚多而各部院堂官不加詳查瞻顧姑容且見漢官每有奏稱總兵官及各武官並無兵丁應行裁汰者有將文職冗員奏請裁汰者乎此皆伊等偏執之處爾等可將朕諭交與議政王

貝勒大臣九卿詹事科道等官當此錢糧匱乏之時暫行裁汰嗣後錢糧充裕再行增設○丙申賜諡額駙噶爾瑪索諾木所尙公主爲端順長公主額駙喇麻思所尙公主爲端獻長公主各立墓碑遣內大臣巴圖魯公鰲拜伯索尼致祭○戊戌諭吏部都察院科道爲耳目之官職在發奸剔弊凡大奸大惡從未見人糾劾者果有見聞卽據實直陳乃見公忠爲國近見各官彈章其中多有撫拾塞責將多人已經糾劾之事隨聲附和明係黨與陋習豈朝廷設立言官之意以後務宜洗滌肺腸痛除黨比不許仍前勦襲妄陳○己亥以郝惟訥爲戶部右侍郎由大理寺卿遷○庚子贈湖廣陣亡都司劉應科官廕○辛丑湖廣容美土司田吉麟以所部兵二萬投誠 上嘉獎之命所司速敘○癸卯諭禮部奉 聖母皇太后諭定南武壯王女孔氏忠勳嫡裔淑順端莊堪翊壺範宜立爲

東宮皇妃爾部卽照例備辦儀物候旨行冊封禮○撤各省守催錢糧滿官○允禮部議平南王下考取生員各十五名舉人各三名俱於廣東應試照漢軍例編號會試取中進士與漢軍例同○福建巡撫宜永貴奏甯化逆首黃素禾勢蹙投誠餘黨悉散○甲辰諭禮部致祭 天地 太廟 社稷不可不虔嗣後凡祭 圜丘 方澤朕於五鼓出宮祭 太廟 社稷於黎明出宮爾部先期一日奏聞永著爲例

東華錄

順治二十七

臣王先謙敬編

臣周倫蕃恭校

秋七月戊申廣西巡撫于時躍奏官兵擒斬賊渠僞義甯伯龍韜
○己酉和碩襄親王博穆博果爾薨年十六○庚戌定遠大將軍
世子濟度等奏僞都督總兵黃梧副將蘇明鄭純等謀斬僞總兵
華棟等並殲其部兵四百餘名率眾薙髮獻海澄縣投誠隨遣梅
勒章京翁愛等入城安撫計降其文武大小僞官八十六員兵一
千七百名得旨黃梧等獻城歸順可嘉著卽行優擢○壬子上
多居乾清宮○癸丑大赦天下○乙卯甘肅巡撫周文葉以老病
免○戊午以佟延年爲右副都御史巡撫甘肅由河南左布政使遷○辛酉
以賈漢復爲工部侍郎由理事官遷○丁卯諭禮部內設衙門原有六

監二司今因在內禮儀事務殷繁未有衙門專管將舊設鐘鼓司改爲禮儀監尙寶監改爲尙寶司○辛未敘征湖廣功將士升授有差

八月丙子朔裁陝西同官縣金鎖關巡檢○戊寅免江西廣信饒州吉安去年旱災額賦○乙酉裁山西糧屯道○丁亥諭戶部朕親詣 慈甯宮朝見 皇太后奏知畿輔近地連年荒歉今歲自夏徂秋復苦霖雨飛蝗民生艱瘁蒙 皇太后慈諭小民如此苦楚深爲可憫所有宮中節省銀三萬兩卽行發出速加賑濟欽此應卽遣廉幹官員前往順天府所屬等處確查被災貧民酌量賑給務令均霑實惠爾部可卽開列應差官員職名具奏其紳衿商民人等有能好義急公捐輸銀米協資周恤者卽將所輸交各該地方官稽覈支散造冊彙報爾部卽察明獎敘○己丑免福建莆

田等三縣衛十一年十二年荒地額賦○壬辰諭吏兵二部鎮守

海澄都督總兵官黃梧棄逆效順殺其同守僞官華棟僞兵率民

薙髮領標下官屬兵丁獻城輸款倡首來歸深可嘉尙黃梧著加

優典封爲海澄公照例給與敕印其標下各員從優議敘具奏○

停遣滿官樞關○癸巳福建巡撫宜永貴奏海逆數十萬襲陷閩

安鎮直薄省城連營數十里攻圍旬餘滿漢官兵奮勇剿殺賊眾

潰敗重圍始解○丙申以鍾鼎爲廣東按察使由陝西苑馬寺卿遷袁一相

爲陝西按察使由山西冀甯道參政遷○丁酉免順天府屬比年災傷地畝

額賦○辛丑命三年一大閱著爲令○轉潘朝選爲河南左布政

使由山西右布政使轉○壬寅 上仰承 皇太后慈訓製爲內則衍義成

書並爲序文恭呈 御覽序曰臣聞政治之道有大經大法以儀

型乎邦國必有內治內教以模楷乎宮闈故關雎爲王化之端乾

坤居大易之首聖人垂訓未有不以門內爲兢兢者也三代以前
聖后賢妃肇修內治以致化行俗美具載典冊自非天佑至德孰
能集貞淑之大成振古今之懿化哉恭惟 聖母皇太后佐我
皇考興道致治 徽音雍穆 慈誨周詳有典有則興仁興讓允
爲萬世壺教之軌範臣敬遵 慈旨蒐輯古來嘉言美行統成一
編上備 披閱下示來茲謹按內則所載皆閨門之內起敬起孝
興仁興讓之事而首曰后王命冢宰降德於眾兆民謂此乃王后
世子所躬行心得而可爲民法者故不言布教而言降德也夫聖
人言欲治其國者先齊其家又言家正而天下定齊之正之其惟
內則乎世傳后妃紀列女傳家範內訓諸書著作不少然未嘗原
本內則而發明之豈所以尊經立教與今是書一本經旨而推行
之微而聲氣容色顯而言動儀文精而樂心養志粗而中饋女工

所以操其心而檢其身者施諸一家無不宜放乎四海無不準究其指歸有八要焉孝者順親之要其類有二事舅姑事父母是也敬者內助之要其類有五事夫勸學佐忠贊廉重賢是也教者倡後之要其類有三教子勉學訓忠是也禮者持己之要其類有九敬祭祀肅家政定變守貞殉節端好尚崇儉約謹言慎儀是也讓者睦戚之要其類有四崇謙退和妯娌睦宗族待外戚是也慈者推恩之要其類有五逮下慈幼敦仁愛民宥過是也勤者修業之要其類有二女工飲食是也學者取法之要其類有二好學著書是也每舉一類必證以聖賢經傳之學實以古今淑順之行所采事蹟貴賤不同而其道則同所引文辭深淺不一而其理則一闡明大指詮釋微文名曰內則衍義自禁壺達乎閭巷咸於斯取則焉必皆感發其性情漸摩乎禮義廣教化而美風俗官闈之嘉言

懿行與邦國之大經大法並垂不朽 聖母皇太后休聲盛德炳
若日星永作則於萬世矣○乙巳免山西大同府去年被災額賦
九月丙午朔甯海大將軍固山額真伊爾德等奏臣等領兵至杭
州海逆僞總兵王長樹毛光祚沈爾序等擁賊兵登岸侵犯大蘭
山等處遣梅勒章京顧祿古總兵官張承恩引兵趨夏關擊敗之
至兩斗門賊復迎戰又擊敗之斬長樹光祚爾序並頭目及賊兵
無算臣率師次甯波乘舟趨定海縣分三路進發賊渠僞總制陳
六御僞英義伯阮思等於海島里江口山下列戰艦以待臣等率
兵進攻賊兵敗北追至衡水洋口陣斬六御思等擒獲甚多遂取
舟山得旨褒獎下所司從優議敘○戊申遣官畿輔慮囚○庚戌
廣東左布政使曹溶浙江右布政使李士焜緣事罷職○癸丑固
山額真朱瑪喇等奏故肅親王豪格勦滅陝西逆賊賀珍陣斬賊

首張獻忠定漢中取四川功績甚多酬庸未及昔豫王勦流賊於潼關下江南獲福王加封曰德賜黑狐帽貂鑲衣貂袪金銀鞍馬等物肅親王與之埒而封賞未議由睿王異視之故也下議政王貝勒會議尋議肅親王封號賞資應如豫王例王薨後數年未給俸祿應爲補給得旨肅親王領兵下蜀勦滅秦寇解圍漢中斬賊首張獻忠敗賊一百三十六營勦撫無算厥功甚茂自應加封錫賞睿王攝政時竟置不議朕深憫焉今值國用未敷俸祿暫停補給其加封恩錫悉如議速行○甲寅移廣東嶺南守道駐清遠縣○癸亥山東巡撫劉允謙奏臣審錄重囚內有斬罪蠹書周一聘絞罪犯官張暉多贓未完請監候追完處決得旨貪官汚吏問擬秋決卽按期處決何得以追贓未完又請監候以後凡係貪汚應秋決者不許再請停決永著爲例○僞總兵顧忠率眾降○己巳

京察湖廣總督祖澤遠以才力不及降一級解任操江巡撫秦世楨以才力不及降一級調用湖廣巡撫林天擎以才力不及降一級照舊供職○壬申追諡和碩肅親王豪格爲和碩武肅親王○癸酉諭吏部朕思大學士旣在內院辦事不宜又在議政大臣之列今後不必令大學士與議

冬十月丁丑以蔣國柱爲兵部左侍郎兼右副都御史提督操江

巡撫安徽

由戶部侍郎遷

○戊寅改設登聞鼓於右長安門外以科道官

更直○己卯裁六科漢軍副理事官其見任者俱改爲御史○庚

辰平西王吳三桂等奏四川開縣僞巡撫鄧希明僞總兵張元凱

率眾降○乙酉轉馮如京爲廣東左布政使

由江南右布政使轉

以曹國炳

爲山西右布政使

原任湖廣右布政使

田起龍爲湖廣右布政使

由福建按察使遷

楊思聖爲河南右布政使

由山西按察使遷

郭鳴鳳爲湖廣按察使

由興屯道

副使遷

○己丑降湖廣巡撫林天擎五級調外用以保舉隨州知州

程文光行賄營升事覺連坐也○甲午以胡全才爲兵部右侍郎

兼右副都御史總督湖廣

由鳳陽撫治遷

○乙未

上幸南苑○丙申以

張尙爲右副都御史撫治鄖陽

由左僉都御史遷

○辛丑甯南靖寇大將

軍阿爾津等奏大兵渡江賊聞風逃遁固山額真卓羅等統兵追

勦斬獲甚眾克復辰州下所司察敘○壬寅甯南靖寇大將軍阿

爾津等奏土司永順總兵彭宏澍率其部下官吏並籍所屬三州

六司三百八十洞戶口以降

上嘉獎之下所司察敘○禮部奏

祈穀之祀自周行之其來遠矣雖明時有行有止然祈穀所以爲

民應照舊典舉行於正月上辛日恭祀

上帝於祈穀壇請太

祖神位配饗報可○癸卯諭吏部朕向因大學士陳之遴賦性偏

執屢經訓飭不肯悔改故令盛京居住用示懲創今伊自應省悟

前非且念其效力多年不忍終棄著回京入旗以示朕始終曲成至意○諭刑部朝審秋決係刑獄重典朕必詳閱招案始末情法允協令死者無冤今決期伊邇朝審甫竣招冊繁多尙未及詳細簡閱驟行正法朕心不忍今年姑著暫停秋決昭朕欽恤至意○給事中王益朋奏我朝兵制統以固山額真分隸牛彖有事抽調無事歸旗卽唐府兵制也考明初在內設有五軍都督府在外都司衛所皆莅以勳舊各鎮總兵俱帶府銜征剿有功者則內升五府又設十二團營以侯伯及戎政尙書領之居重馭輕內外維繫幾三百年無尾大不掉之患今日八旗卽當日十二團營也固山梅勒卽團營之提督協理等官也制與前代不謀而合獨五府之設尙未議立恐各鎮總兵勤勞於外將來無內升之地乞敕大臣會議或仍照五府舊制或以八旗更立八府令各旗統之而左右

僉書則以爲外臣內升之職因時制宜法莫善於此下所司議

十一月丙午 上還宮○丁未 興京陵工成遣官祭告○戊申

巴圖魯公鰲拜創發臥疾 上親臨視之○辛亥 上幸南苑○

諭禮部朕維治天下必先正人心正人心必先黜邪術儒釋道三教並垂皆使人爲善去惡反邪歸正遵王法而免禍患此外乃有左道惑眾如無爲白蓮聞香等教名色邀集結黨夜聚曉散小者貪圖財利恣爲奸淫大者招納亡命陰謀不軌無知小民被其引誘迷罔顛狂至死不悟歷考往代覆轍昭然深可痛恨向來屢行禁飭不意餘風未殄墮其邪術者實繁有徒京師輦轂重地借口進香張幟鳴鑼男女雜遝喧填衢巷公然肆行無忌若不立法嚴禁必爲治道大蠹雖倡首奸民罪皆自取而愚蒙陷網羅辟不無可憫爾部大揭榜示今後再有踵行邪教仍前聚會燒香斂錢號

佛等事在京著五城御史及該地方官在外著督撫按道有司等
官設法緝拏窮究奸狀於定律外加等治罪如或徇縱養亂爾部
卽指參處治○以胡文華爲浙江右布政使由山東按察使遷王無咎爲
江南右布政使由浙江按察使遷徐來麟爲山西按察使由浙江金衢程道參政遷
之璿爲福建按察使由陝西督糧道參政遷○左副都御史宜巴漢以病致
仕禮部右侍郎王國雄以才力不及解任○壬子給事中嚴沆奏
漢人武職立功投誠者曾無在京職銜可以內轉櫛風沐雨勦力
行間不得一日甯息仰觀天顏非所以獎忠勤也且閩海一帶
投順僞官便授公侯之爵儻日後立功何以加之目今五軍都督
府之制未便盡復宜將鑾儀衛崇其體貌遇缺升補中後兩府已
經設官或量增數員以爲武臣內轉之地庶立功者知所勸投誠
者有所容至於各省駐防鎮將歷年久則地熟弊生宜限年更調

其罷斥武臣仍得私畜弓馬家丁更恐潛通盜賊貽患地方並宜
密敕禁防則經制定而功罪交得其宜矣下所司議○丙辰湖廣
總督胡全才卒予祭二次加祭一次賜全葬贈兵部尙書廕一子
入監讀書○索倫部達爾巴等來貢○戊午烏斯藏闡化王來貢
○丙寅以張長庚爲兵部右侍郎兼右副都御史巡撫湖廣

院學士遷

十二月甲戌朔以朱衣助爲山東按察使

由河南河北道參政遷

錢朝鼎爲

浙江按察使

由廣東提學道副使遷

王舜年爲江西按察使

由山西冀甯道參政遷

○

乙亥停保舉優升大府知府例○戊寅降督捕侍郎梁清遠三級

調用以保舉張益慶爲杭州府知府後益慶因罷輒無能革職連
坐舉主也○己卯冊內大臣鄂碩女董鄂氏爲 皇貴妃頒恩赦

○戊子

上還宮

○己丑封益挫監挫爲闡化王○壬辰定滿洲

蒙古恩廕例一品二品官廕生俱以六品他赤哈哈番用三品官

廕生以七品筆帖式哈番用○甲午轉白允謙爲吏部左侍郎調

朱鼎延爲吏部左侍郎管右侍郎事以孫肇興爲工部左侍郎由宗

人府府○乙未命李蔭祖仍以兵部尙書兼右副都御史總督湖

廣○丁酉加上 皇太后徽號曰 昭聖慈壽恭簡安懿章慶皇

太后○兵部議覆廣西巡撫于時躍奏巨逆李定國前在土司遣

妻張氏並家口到省來投請給住宅銀米養贍以繫其心並氏父

張應選及家口人等俱給月米使定國遙感 皇恩速來就撫得

旨李定國妻張氏及家口人等在彼養贍恐有未周負朕體恤本

懷爾部卽差章京一員令各督撫遴委的當員役途次供給防護

同送來京從優恩養以彰朕招徠至意○命 太廟牌扁停書蒙

古字止書滿漢字○戊戌頒恩赦○己亥轉孫肇興爲工部左侍

郎以林起龍爲工部右侍郎

由大理寺卿遷

○以張爾素爲刑部右侍郎

由通政使遷

○庚子贈死事永州府通判鄺允昌官○是歲人丁戶口

一千五百四十一萬二千七百七十六田地山蕩四百七十八萬
一千八百六十頃畦地二萬二千六百四十三箇徵銀二千二百
八萬九千六百九十六兩三錢米麥豆五百八十一萬二千六十
石二斗有奇草四百六十七萬四千五百五十五束茶八萬二千
五百八十五筥行鹽四百四十六萬四百五十六引徵課銀二百
三十九萬五千九百七十五兩二錢有奇鑄釐錢二十六萬四百
八十七萬二千三百八十有奇舊鑄銅錢二十一萬三千三百七
十有奇鈔一十二萬八千一百七十二貫四百七十有奇

東華錄

順治二十八

臣王先謙敬編

臣周潤蕃恭校

順治十四年丁酉春正月甲辰朔朝鮮來貢○庚戌浙閩總督李率奏逆渠陳德容叛亂擾害三省幾及十年今悔悟就撫○辛亥祈穀於上帝奉太祖武皇帝配享○癸丑以魏裔介爲左都

御史

由左副都御史遷

○工部奏凡各壇廟門上扁額或從太廟例去

蒙古字止書滿漢字或仍用舊額得旨如太廟例○甲寅甯海

大將軍固山額真伊爾德征舟山凱旋上命多羅貝勒杜蘭等

迎勞之○乙卯命張懸錫仍以兵部尙書兼右副都御史總督直

隸山東河南○定遠大將軍世子濟度奏梅勒章京覺羅阿克善

率師平閩見烏龍江難渡遂沿江由山僻尋渡口往福州聞逆賊

在福州府高齊陸路遂先遣褚庫巴圖魯巴度進剿遇賊千餘擊敗之斬二百餘級分遣署護軍統領宜格圖率兵往侯官縣征剿水賊遇賊千餘拒敵又擊敗之斬百餘級阿克善至福州偵知賊船二百餘艘泊於高齊境烏龍江阿克善等由水路夸蘭大星鼐等由陸路齊進又擊敗之追至大漳河口陣斬僞都督總兵僞都司二員獲大小船十四艘悉獲其軍械又聞泉州府大營地方有賊千餘隨令護軍統領穆成格夸蘭大馬喇等前往擊敗之斬七百餘級又惠安縣海港內封渭沙格黃齊等三村賊眾盤踞令護軍統領覺羅雅布蘭等率兵前進擊敗之斬僞官二賊千七百餘級獲大小船五百九十艘又衛套泊有賊船夸蘭大大雅等擊敗賊眾焚其船十七艘又閩安鎮對岸梅花礁石二村匿留賊黨令梅勒章京阿玉錫等領兵拔剿斬賊四百餘級焚其船八艘又令

委署章京肫退等往烏龍江渡口偵探遇賊眾敗之焚其船十七艘又令署護軍統領石漢巴圖魯協領拜柱護夸蘭大霍特率領滿兵會合中路總兵官楊捷進取漳浦縣海島內銅山所值海風忽作後軍難渡署雲霄鎮參將張韜等先登舟半渡賊眾突犯韜同千總一員把總二員兵六十餘名俱戰歿因兵力單薄暫停攻取再圖相機前進前者恢復海澄具疏後賊勢消阻陸續投誠僞都督總兵一副將五參將八遊擊二都司四守備三千總七把總八閒散官六文職二旗鼓中軍一操官四義將一大小各官共五十二兵三千二十六名原任同安參將楊啟智舟山中軍遊擊杜茂祐前以失守從賊今繳僞關防來降下兵部察敘○戊午諭禮部金代帝陵向在房山縣地方歷有年所迨至明季國運衰微因我朝克取遼東誤疑金代陵寢王氣相關遂將陵後地脈掘斷又

因己巳年我 太宗皇帝統師入關追念金代先德特遣王貝勒大臣往陵告祭乃故明復將陵前石柱等拆毀建立關帝廟鎮壓風水朕思天祚本朝於金何與故明不思運數有歸輒毀及金朝陵寢愚誕甚矣除金太祖世宗已入帝王廟祭祀其陵寢照舊守護地方官春秋致祭外爾部卽遣官前往房山看視金陵周圍如切近處所果有毀壞卽酌量修整仍撰文一道敘述緣由祭告立碑以誌不朽其關帝廟仍舊留存○諭吏部朕惟制科取士課吏薦賢皆屬朝廷公典原非臣子可借以罔上行私市恩報德之地至於師生稱謂必道業相成授受有自豈可攀援權勢無端親暱近乃陋習相沿會試鄉試考官所取之士及殿試讀卷廷試閱卷學道考試優等督撫按薦舉屬吏皆稱門生往往干謁於事先徑竇百出酬謝於事後賄賂公行甚至平日全未謀面一旦仕宦同

方有上下相關之分輒妄託師生之稱或屬官借名獻媚附勢趨
炎或上官恃權相迫恐喝要挾彼此圖利相煽成風恬不知恥以
致屬吏職業罔修精神悉用之交結上司弗問吏治喜怒一任乎
私心因而薦舉不公官評淆亂負國殃民不知理義深可痛恨朕
欲大小臣工共滌肺腸痛革積弊以後內外大小各官俱恪守職
業不許投拜門生如有犯者卽以悖旨論罪薦舉各官俱照衙門
體統相稱一切讀卷閱卷考試等項俱不許仍襲師生之號卽鄉
會主考同考務要會集一堂較閱試卷公同商訂惟才是求不許
立分房名色如揭榜後有仍前認作師生者一併重處不貸爾部
卽通行嚴飭內外各衙門務令恪遵永絕朋黨之根以昭朕激勸
羣工共還蕩平至意○庚申以盧崇峻爲兵部左侍郎兼右副都
御史總督宣大由吏部右侍郎遷盧慎言爲江南按察使由四川北○

壬戌以科爾坤爲副都御史

由學士遷

○甲子諭吏禮兵三部我國家

勅興全賴治兵有法今見八旗人民崇尚文學怠於武事以披甲爲異途遂致軍旅較前迴別詳究其源皆由限年定額考取生童鄉會兩試卽得升用及各部院衙門考取他赤哈哈番及筆帖式哈番徒以文字由白身優擢六七品官得邀俸祿未幾又升副理事主事等官得免從軍之役各部院衙門一事數官以致員缺居多人樂趨之今後限年定額考取生童鄉會兩試著停止各部院衙門取用人員不必分別滿漢文學初用授以筆帖式哈番停其俸祿照披甲例給以錢糧任滿三年如果勤敏該堂官詳覈給以七品俸祿再滿三年果能稱職升補他赤哈哈番又各部院衙門中見無五品職官升轉太速而一應降罰亦不便其副理事官主事品級旣同而主事又升副理事官著將主事改爲五品以便升

轉處分各部院衙門自理事官以至筆帖式哈番各衙門詳加查覈留用冗員盡行裁去至於官員子弟及富家世族應披甲者各該牛彙章京甲喇章京梅勒章京固山額真不行嚴察本身不充兵役盡令家僕代替或充兵役及至征剿又令代替或不充兵役多居閒散著卽曉諭八旗自固山額真以下牛彙章京驍騎校以上概行嚴禁違者治以重罪其驍騎校護軍校均係武職若署章京事方准敘功不署章京事則不與議敘殊屬不合今後驍騎校護軍校俱著一體敘功至護軍及披甲人役有功除登城外雖首先陷陣臨敵斬級效力居多止加賞賚無授官之例今天下一家非比昔時攻城之役甚少若仍照舊議敘數十載無攻城之役何以鼓舞兵士著該部酌量另行定議具奏其每牛彙下子弟一人讀書仍遵前旨行各部院衙門員缺卽以讀書子弟補用不得取

用閒散人舊例官員遇恩詔及考滿俱得廕一子入監讀書如常
令讀書補授文職者仍多則止尙文學不習武事其廕入國子監
讀書各官子弟盡行停止令其學習武事卽於武職補用自今以
後送監讀書者暫行停止俟太平之日仍照舊行其考滿各官作
何加恩該部酌量另行定議具奏○乙丑以謝道爲戶部右侍郎
由山東左布政使遷董應魁爲刑部右侍郎由廣西右布政使遷傅維鱗爲左副都御
史由通政使遷○丁卯封武肅親王豪格子猛莪定親王博洛子塔爾
納俱爲郡王豫郡王多鐸子多爾博爲貝勒○封 皇貴妃父三
等精奇尼哈番鄂碩爲三等伯○庚午喀爾喀部畢席勒爾圖汗
來貢

二月丙子以潘朝選爲禮部右侍郎

由河南左布政使遷

○丁丑禁止官民

採用枿木○戊寅諭大學士傅以漸日講官曹本榮曰朕覽易經

一書義精而用博範圍天地萬物之理自魏王弼唐孔穎達有註
釋正義宋程頤有傳迨朱熹本義出而後之學者宗之明永樂閒
命儒臣集元代以前諸儒之說彙爲大全皆於易理多所發明但
其中同異互存尙有繁而可刪華而寡要之處迄今幾三百年儒
生學士發揮經義者亦不乏人當並加採擇折衷諸論簡切洞達
輯成一編昭示來茲爾等殫心研究融會貫通其必析理精深敷
詞顯易約而能該詳而不複使義經奧旨炳若日星以稱朕闡明
四聖人作述之至意○諭禮部禮莫重於事 天孝莫大於尊
親朕纘承鴻緒恪修祀典每歲 郊祀皆奉 太祖武皇帝配享
今思 太祖受命 上天肇興帝業 太宗繼志述事丕振皇猷
功德並隆咸宜崇祀以後冬至祈穀祭 天俱奉 太宗同 太
祖配享夏至祭 地亦奉 太祖 太宗配享著爲定例○諭人

君事 天如子弟事父宜酌典禮用抒悃誠今 太廟外別建

奉先殿不時祭享而郊祀 上帝僅歲一舉行於朕昭事之心尙

有未盡茲欲於禁城中卜地營建 上帝殿宇歲序令節時展明

禋俱奉 太祖 太宗配享庶敬 天事 先大禮始備爾部卽

詳議致祭日期及一切典儀具奏○癸未諭禮部南郊祀 天禮

宜嚴重以後祀前一日朕親宿齋宮祀前五日親詣視牲如遇遣

官恭代亦著詣壇齋宿視牲永著爲例○兵部奏故明楚藩崇陽

王朱蘊鈴與僞總兵李盛功等向化投誠朱蘊鈴應併家口起送

來京分別養贍僞總兵李盛功應授參將職銜從之○甲申諭工

部朕念故明崇禎帝尙爲孜孜求治之主止以任用非人卒致寇

亂身殉社稷若不亟爲闡揚恐千載之下竟與失國亡國者同類

並觀朕用是特製碑文一道以昭憫惻之意爾部卽遵諭勒碑立

於崇禎帝陵前以垂不朽○禮部奏臣等查禮經祭不欲數又考之舊典唐天寶五年詔南北之郊未展於時享粢盛且畧對越何申自今以後每在四時孟月先擇吉日祭上帝等語茲禁城中於奉先殿東卜地營建上帝殿宇歲序令節崇祀奉太祖太宗配享禮屬勦舉臣等酌議元旦皇上萬壽皇太后聖誕三大節上應親詣上帝殿行禮致祭除孟春元旦行禮冬至有南郊大祀外其夏秋二孟月亦應選擇吉日上親詣行禮其祭祀禮儀及祭品俱應照祀天例行但係內祭惟初奉安神位應讀祝文餘祭日不用祝文及福胙福酒不燎牛其初奉安神位之禮俟上帝殿各神位恭製畢擇日奉安得旨如議行○兵部右侍郎高景以母憂解任○乙酉東夷託科羅氏南迪歐等來貢○丙戌革職御史王昌允以窩盜殺人及諸不法事訊實

棄市○己丑以佟鳳彩爲廣西右布政使

由河南管糧道參議遷

○給事中

張文光奏聖至孔子贊美難以形容考之古典魯哀公誅文曰尼父未嘗加一字之褒漢平帝元始元年始加謚曰宣尼父後魏太和十六年乃謚文聖尼父唐太宗貞觀十一年尊爲宣聖尼父明臬開元二十一年始進謚文宣王元武宗至大元年加謚大成至聖文宣王明初因之嘉靖九年尊改爲至聖先師孔子神位以孔子生不爲王歿而王之於理未安且以文宣之號未足以盡孔子曰至聖則無所不該曰先師則名正而實稱不可易矣我朝順治二年祭酒李若琳不加考訂請易至聖先師孔子神位爲大成至聖文宣先師孔子不過仍元武宗之舊謚而獨不稱王耳臣維追王固屬誣聖卽加大成文宣四字亦豈足以盡孔子哉唐臣柳宗元有言贊孔子之聖譬如頌天地之大諛日月之明非愚則惑今

皇上事事稽古議禮制度考文務求至當宜仍改主爲至聖先

師孔子神位庶質之先聖而無疑傳之萬世而永遵矣下所司議

從之○庚寅贈陣歿佐領王世富官○壬辰以張天植爲兵部右

侍郎

由大理寺卿遷

○丙申以田厥茂爲福建右布政使

由江西湖西道參政遷

徐

化成爲廣東右布政使

由山東登萊道參政遷

○丁酉立盛京三元神廟碑

文曰自古帝王之興莫不首隆祀典凡有功德於民者皆爲建壇

宇而通肸鬻蓋神旣佑民以福則國必崇祀以報神此廟貌所由

隆也我太祖太宗手定大業拯斯民於塗炭膺景祚之絲長

雖積功累仁所致而百神之靈寶式憑之太清門東三元神廟禱

之輒應及民功德亦爲最著考之道書神有天地水府之別國家

當干戈擾攘之際急圖康阜使時和年豐室廬相慶則天官賜福

主之其或貫索未空金氣猶沴使斯民秉德格非遠刑罰而登老

壽則地官赦罪主之又或大軍之致凶年大荒之致奇疫滌其眚
災而消其害氣則水官解厄主之然則使民殷富使民樂利使民
康甯而因以默佑我邦家孰非神之賜也歟嗚呼發祥重地永藉
呵護之靈凡我生民咸賴乂安之福爰命勒石用表神功以垂不
朽○己亥命寬隱匿逃人律○刑部尙書劉昌請假遷葬允之○
庚子喀爾喀部冰圖台吉等以悔罪朝貢賜宴優禮之○壬寅山
西雲鎮地震有聲

三月己酉奉 太宗文皇帝配享 圓丘及 祈穀壇○多羅郡
王塔爾納斃年十五諡敏思○壬子奉 太祖武皇帝 太宗文
皇帝配享 方澤○癸丑以配享禮成大赦天下○甲寅詔直省
學臣求遺書○江南江西總督卽廷佐奏請舒江南三大困一江
南官多降調爲錢糧積欠多而考成嚴也以數年之積逋追徵於

一時官有必去之念民無懾服之心爲有司者尙能力布 皇仁
耶請將考成規則去其降調之例重不過革職戴罪仍令在任課
其成功自必安心治理矣一江南自八年至十三年積欠錢糧四
百餘萬未必盡欠在民或官吏侵蝕或解役烹分新舊牽混上下
朦朧請以十四年爲止通將從前積欠總令右布政使查其已解
而無批回被經承侵欺那借者及某官支用提取而不應開銷者
註數請追分爲二冊若民閒實欠則又爲一冊議定一年止徵若
干示民知有應完之數分路督催責成各道握總者爲右布政使
按冊而稽專理舊欠一切新糧專責左布政使則徵新補舊之弊
可除矣一江南爲數省咽喉商賈舟楫所聚向因大軍經過封船
載送商民坐困或謂禁封貨船但封空船不知江河之內舍貨船
則空船無幾豈能載往還兵馬乎臣見江西已經造船備送兵馬

江南亦可踵行庶商困得蘇軍機不誤矣 上以其言深切時弊

下所司詳議○乙卯以楊茂勳爲吏部侍郎

由督補右理事官遷

○戊午以

祖重光爲山西右布政使

原任湖廣右布政使

○丙寅先是海澄公黃梧具

揭兵部據稱海賊俱屬漳泉潮惠之人梧今大張布告必漸次歸

附但鄭成功恃其父芝龍在京欺誑招撫藉以登岸派餉故首惡

在芝龍必先斷絕芝龍使之音問不通則成功海上之匹夫耳又

成功之敢於猖獗由其父芝龍誑謀罔

上齎書下海揚言招撫

沿海人心搖惑凡欲投誠者咸以欲撫之故仍堅其怙惡之心請

密奏剪除芝龍以絕其根部議芝龍陰謀已爲家人尹大器告發

且成功既不薙髮歸誠不可仍留芝龍以啟海上觀望之心芝龍

及其弟芝豹子世忠世恩世廕世默應請敕刑部正法 上命議

政王貝勒大臣密議以聞○丁卯定遠大將軍世子濟度班師還

京時濟度父鄭親王母福金弟敏郡王及世子福金已相繼薨逝
及至京 上命議政大臣哈世屯等迎至盧溝橋告之世子隨詣
靈柩前哭泣盡哀然後還府 上親臨其第濟度率官屬出迎
上望見惻然墮淚稍前 上降輿執其手慟甚侍臣無不揮涕
上謂濟度曰朕來初欲相慰及見爾慟不能已爾尙勉聽朕言少
節悲哀爲國自愛遂手賜茶酒復賜諸貝子公大臣茶畢還宮○
海澄公黃梧奏鄭成功未及剿滅者以有福興等郡爲伊接濟淵
藪也南取米於惠潮賊糧不可勝食矣中取貨於興泉漳賊餉不
可勝食矣北取材木於福溫賊舟不可勝載矣今雖禁止沿海接
濟而不得其要領猶弗禁也夫賊舟飄忽不常自福興距惠潮乘
風破浪不過兩日而閩粵有分疆之隔水陸無統一之權此成功
所以逋誅也宜敕沿海督撫鎮臣與臣商度防海事務平時共嚴

接濟之處遇賊備加堵截之防臣專一整飭馬步舟師視賊所向到處撲剿至羣賊伎倆臣所熟悉破賊機宜臣籌之素矣抑更有請者成功之所以稔惡倚其父芝龍陰通家信搖惑民心故逆黨堅不悔禍誠嚴禁芝龍父子不許音信往來成功將立見敗亡也下兵部密議○戊辰初 上以浙閩總督屯泰巡撫秦世禎玩誤封疆命吏部都察院詳察具奏至是議奏浙閩總督原駐衢州居中調度乃屯泰移駐杭州爭居撫署及舟山台州等處相繼失守又不一至海上親視情形秦世禎身任巡撫不思早備密防以致地方叛變失事之後不能擒剿均難辭罪屯泰應革去三等阿達哈哈番秦世禎應革職爲民從之○辛未以山西右布政使曹國柄爲通政使○壬申詔廷試貢生不必擬以通判用裁去上上卷名色所取上卷以知縣用中卷以州同州判縣丞用○革工部右

侍郎程正揆職以御史張自德劾其典試山西及在京邸時縱酒挾妓行止不檢也

夏四月甲戌復設衛河分司一○南贛巡撫佟國器奏興甯縣雷連十二峒瑤官龐國安等投誠○贈陣亡徐光錦李雲龍呂克忠徐忠武林勇王國臣王效舜張奇勅王興基談進學李應第哈世圖王世輔官以子襲職○丙子厄魯特部敖齊爾圖台吉子伊拉古克三班第大胡土克圖等來貢○贈陣亡白含貞褚得龍劉應瑞吳效忠馬春武洪謨王用賢劉顯漢劉有進趙袞宋友功官以子弟襲職○丁丑議政王貝勒大臣會議鄭芝龍寄書伊子成功並無歸順之意出語驕肆理難存留芝龍及其弟芝豹子世忠世恩世廕世默俱應正法得旨鄭芝龍等法當處斬向念其投誠功績從寬禁錮今若遽行正法非朕前意仍著免死俱流徙甯古塔

地方家產籍沒○庚辰厄魯特部綽克圖台吉等來貢○革職欽
天監回回科秋官正吳明炫奏臣祖默沙亦黑等一十八姓本西
域人自隋開皇己未年爲麻元抱其麻學重譯來朝授職麻官歷
一千五十九載專管星宿行度吉凶每推算太陰五星陵犯天象
占驗日月交食卽以臣科白本進呈 御覽著爲定例順治三年
本監掌印湯若望諭臣科凡日月交食及太陰五星陵犯天象占
驗俱不必奏進臣查若望所推七政麻水星二八月皆伏不見今
水星於二月二十九日仍見東方又八月二十四日夕見皆關象
占不敢不據推上聞乞 皇上立臣內靈臺以存臣科庶絕學獲
傳並上順治十四年回回科推算太陰五星陵犯書一部日月交
食天像占驗圖象一本事下所司○辛巳諭外藩王貝勒貝子公
曰爾等勿以喀爾喀厄魯特歸降遂弛武備宜遵定例春秋二次

查驗器械照常習射至盜賊竊發皆該管之人懈弛所致各扎薩克王貝勒貝子公等下各有固山額真梅勒章京甲喇章京牛彖章京十家長若嚴禁查處盜賊何由而起此後宜嚴行誠飭勿致懈怠又蒙古台吉俱分別等級優免人丁其餘人丁三丁之內派甲一副乃披甲人等以其身非台吉屬人遂行藐視不知各台吉皆率領本國來歸乃有功之人其令優免人丁者一則分別貴賤一則恐披甲之人出兵則台吉無人以供使令自今以後披甲藐視本主卽於扎薩克王貝勒等處告理查其虛實治罪至編審人丁勿得欺隱如有舉首欺隱者卽於審丁之年具告儻遲至二三年具告則不及比之幼丁必已長成雖告不准○癸未四川保甯府威茂二州地大震○甲申增太常寺副理事官一筆帖式六○丁亥諭刑部今歲自春徂夏連月不雨三農失望朕夙夜儆惕揆

厥所由或因刑獄未清無辜枉抑以致上千天和膏澤不降茲特
遣索尼費揚古金之俊查布海朱之錫會同爾部將見在獄犯無
論已結未結逐一詳加審鞫其有無知而罹法網小過而陷重辟
者卽與察明事由開列具奏務使情法允協有枉必申以昭朕祈
天恤民之意○辛卯 上親禱雨於 郊壇未還宮大雨○壬
辰以固山額真宗室羅託爲甯南靖寇大將軍駐防荊州固山額
真伯佟六十駐防長沙○癸巳以白允謙爲刑部尙書由吏部左
侍郎遷
○丁酉 上幸南苑○定水戰跳船升賞例○戊戌置盛京奉天
府○辛丑以許文秀爲廣西右布政使由按察
使遷

五月癸卯朔日有食之○甲寅封鄭親王濟爾哈朗世子濟度爲
和碩簡親王○丁巳以覺羅伊圖爲兵部尙書由宗人府
啟心郎遷桑芸爲
廣西按察使由河南汝南
道參政遷○刑部議覆大理寺卿杜爾德奏熱審

事宜每歲於小滿前具奏始通行各省但路有遠近不同如候部文到日方行審理必不能依期齊結以後熱審應免具奏令各該督撫按於小滿後十日舉行在京者仍奏請審理永著爲例從之

○戊午 上還宮○裁陝西府谷縣訓導○辛酉以平西王吳三桂率兵破嘉定州賊生擒僞總兵龍名揚招降烏斯藏大乘法王大寶法王及四川三州十六縣擊敗僞撫南王劉文秀馬步兵斬僞將軍王復臣總兵王之俊等獲金印及象馬等物甚多平靖大寇歲加俸銀一千兩其功績增註入冊○癸亥河道總督楊方興引年乞休 上以其久任河督勤練著勞命以原官加太子太保致仕○先是貝子穆爾祜以出師衡州失律削爵及卒家屬無依宗人府議給其子穆赫臨俸視三等鎮國將軍從之

六月丙子轉朱鼎延爲吏部左侍郎以朱之錫爲吏部右侍郎

文苑舉士遷

○庚辰贈福建陣歿遊擊劉天佑官○辛巳免河南彰德

衛輝去年蝗災額賦○壬午免湖南武陵縣去年被水額賦○封

平西王吳三桂妻張氏平南王尚可喜妻舒氏靖南王耿繼茂妻

周氏爲福金○甲申以王原撫爲河南按察使

由大梁道參政遷

○浙閩

總督李率泰密奏逆賊鄭成功父子詭祕芝龍不宜流徙甯古塔

恐由此而遁則將來沿海爲患不可勝言下兵部速議○乙酉定

貝勒以下奉恩將軍以上無後嗣者仍予謚立碑○戊子降補太

僕寺少卿協理兵部督捕事趙開心爲鴻臚寺右少卿○己丑立

金太祖世宗陵碑○甲午敕諭達賴喇嘛曰朕自卽位以來闡化

王曾三遣人進貢每次約千人因其歸化效力誠悃可嘉故兩賜

敕印以示獎勸今復遣堅錯那卜來貢兼持舊玉印一顆並故明

所給敕書求換及覽該部奏稱闡化王原係圖白忒國主後爲圖

白忒臧巴汗所破隸之屬下明季臧巴汗又爲厄魯特國顧實汗所破以闡化王給與達賴喇嘛轉給第巴闡化王遂與達賴喇嘛處授格隆薩喜爾爲喇嘛第巴因有闡化王敕印遂以邊內安島人爲闡化王人遣之以來及問來使堅錯那卜等言闡化王久隸第巴而此次奏章復言闡化王所奏貢賦亦稱闡化王夫闡化王既屬第巴而屢次進貢仍稱闡化王原名今番進貢請換敕印又不奏明前後甚屬不符可將原委具實備書付存問使人西喇布喇嘛薩木坦格隆具奏○辛丑以杜立德爲刑部右侍郎由大理寺卿遷
○經畧輔臣洪承疇以病劇請解任得旨覽卿再奏病勢轉加深軫朕懷軍務殷繁難以靜攝著解任回京調理